

八
卦
觀
象
解

八卦觀象

莊氏學

味經齋遺書一

篇下

乾貞孟冬需應東壁大畜次之爲天門傳曰位乎天
位以正中也斗魁戴匡六星文昌之宮是屬於天門
將相大臣之職也大畜之彖曰不家食吉其之泰曰
何天之衢王者能養賢則道大行也是與室爲嬖訾
之口需之旣濟曰小有言圖書之秘府也傳曰君子
以多識前言往行以畜其德天廡在其上大畜之賁
曰輿說輶其之損曰良馬逐逐馳騫也閣道絕漢抵
營室二彖皆曰利涉大川上爲傳舍賓客之館也需

之小畜曰有不速之客三人來大壯應室厥有離宮
故爲棟宇宮室北落在其外天之藩落也九三曰羝
羊觸藩羸其角八魁天綱在其左右羅罔之象故曰
小人用壯君子用罔罔罔也以禦壯也君子包周身
之防物情有變不逆不億而先覺焉忠信而已矣謂
忠信不可以入患則愚也忠非忠信非信苟忠且信
必知患必知備神而莫之能測斯君子之所以藏身
也王良造父車馬之官在焉壯于大輿之輶大壯也
輿說輻小畜也大車以載大有也雷電雲雨其神司
焉以禦風雨大壯也密雲不雨旣雨旣處小畜也又

其著則所謂雲上于天雷在天上是也羽林天軍壘
辟陳鈇鉞之屬以設守衛示武威需曰致寇至致人
不致于人也大畜曰日閑輿衛天下雖安不忘教戰
也大有曰威如吉善師者不陳之義也其九四曰匪
其彭无咎匪匪者文也容也彭彭者聲也車也德容
之車大僕之職也與異姓同車不同服故曰明辨晷
也天子所與共六尺輿者皆天下豪英於以從容肆
體不亦明矣乎孟冬之月歲祀之時唯聖人爲能享
帝唯孝子爲能享親營室清廟也牲之小大郊禘不
過繭栗烝嘗不過把握大畜之四曰童牛之牯元吉

其五曰豮豕之牙吉養獸之官古天子諸侯則有之
致力致敬以孝畜也是以有慶且喜也酒誥曰越庶
國飲惟祀百吏庶民苟能思中德以羞饋食然後獻
酬而醉飽焉則爾小子繼而興矣鄉飲酒以正齒位
詩曰朋酒斯饗不忘忠愛焉需之五曰需于酒食傳
曰君子以飲食宴樂王政之卽人心也其若此乎營
室之中土功其始吏爰在焉龍見始戒畢於日至脩
城郭宮室之時也泰應危上六曰城復于隍危爲蓋
屋也夬次訟次是與虛爲元武凡司民之星羣臣之
錄皆主虛危傳曰君子以施祿及下居德則忌有君

民之大德有事君之小心其舜禹文王周公之謂與
雖有明天子行爵出祿不敢自專必原於天命儻以
爲己德則王者之忌也況人臣乎維曰豕宰是正百
官有德者司契故爲書契以治察也夫治尙信而貴
簡得人則書契皆信也信人則書契可簡也疑生繁
繁生詐亾乎人矣書契能獨存乎且嘗聞之書契之
要八成不歲改而月易也改之有期衆而誓之故曰
揚于王庭道在決矣人也非書契也人居德而不忌
於是南面而治者寧聽於書豈書之過不知所以執
契之道故也有司命焉曰復卽命有司祿焉曰其邑

人三百戶曰食舊德有司危焉曰渝安貞有司非焉
曰不克訟皆訟之物也夬以聽治聽失則訟生焉訟
之乃復於治四司者法星也坎法也乾天也訟天法
也傳曰君子以作事謀始考之於天是謂大始虛危
主於岱宗爲受命府明堂在焉所以順天法成德法
也刑罰之所從生有源蒙之初曰發蒙利用刑人謂
順成者也人之道貴始德之本宗廟危虛也天子有
事稱先王諸侯稱先君大夫士稱先人言有始也詩
曰訪予落止率時昭考謀其始也古有天府掌祖廟
之守藏民數穀數賢能之書天下之治中皆升於天

府明堂以布之天府以守之公言而靡所爭訟之所
以元吉乎泰之勿用師也夬之不利卽戎也訟之不
克訟也思懼焉思哀焉以辟不祥也復隍之亂其亾
國之墟乎无號之凶其樂哀之咎乎服以訟受何以
遂其媾也記曰明主之守也折衝乎千里之外其征
也衽席之上乎還師泰之初曰拔茅茹以其彙征吉
明主以盡知天下良士之名旣知其名又知其數又
知其所在以其彙則盡知之矣書曰帝臣不蔽簡在
帝心此湯所以征也潔可表柔可藉薦諸宗廟以爲
明酌莫若茅也早能澤悴能榮見於高陸胡顏此生

莫若莧也茅以類君子莧以喻小人碩而不剝果之
所以爲君子也附而未決莧之所以爲小人也夫之
小人有滔天之惡矣危哉危哉其危乃光也夫之夫
之中未光也羣臣之錄以繫虛危進人以禮退人以
禮去三年不反然後收其田里二不眚其邑而三食
其德賢者之類功臣之世不棄而絕之以安宗廟也
坎貞仲冬蒙應北陸北陸虛也與嫠女爲元枵姜氏
任氏實守其地解次渙次未濟次土虛而民耗盜之
象見矣蒙之上曰不利爲寇利禦寇解之三曰負且
乘致寇至傳曰盜之招也離瑜婦服離珠須女之藏

府須女是司嫁取諸侯衆星在其南百姓之象也天子建德因生以賜姓別生分類帝之所以慎辨物居方也其北織女天女孫王者至孝神祇咸喜則三星俱明蒙之二曰包蒙吉納婦吉子克家保傳之篇曰謹爲子孫娶妻嫁女必擇孝悌世世有行仁義者如是則子孫慈孝不敢淫暴黨無不善三族輔之故曰鳳皇生而有仁義之意狼虎生而有貪戾之心兩者不等各以其母於乎戒之哉母養乳虎將傷天下故曰素成胎教之道書之玉版藏之金匱置之宗廟以爲後世戒古者胎教聲音滋味莫不正焉周之興也

大姜大任率用是教周公繫之辭曰包蒙吉胎教之
謂也告萬世也記曰立妃設如大廟然立子設如宗
社然此國家所以崇而三代明王敬其妻子之道也
孝之至也故曰子克家禮曰納女於天子曰備百姓
十二國之象也天子一取十二女所以廣嗣重祖也
故曰納婦吉天子諸侯不再取姪娣雖缺不復補所
以養壽塞爭也諸侯不內取大夫不外取所以防亂
止慝也蒙之三曰勿用取女解之傳曰慢藏誨盜冶
容誨淫三代之衰皆是物也相在斗南太陽守在相
西君子也勢四星在其西北小人也文昌之下北斗

之側戴匡有負之象帝車有乘之象小人而乘君子之器聖王之大禁也陰德拯急玉牀解息漸臺高墉天棖擊蒙大理赦宥天廚飲酒皆在坎位天津列河中以通四方渙表焉其彖曰利涉大川乘木有功也匏瓜可以供濟爲備敗且舟楫之先事也九二曰用拯救民溺乎未濟征凶利涉大川在雲漢之陰故未濟近天津之次故利涉震涉坎者解而拇也漸車之水曳其輪也且奚仲在焉主車之官也紫宮之位應乎坎自訟至困實象內規渙當其中九五曰王居无咎天極句陳居其所而衆星共之庶民惟星渙之大

者也天以王者之都爲居大帝之坐麗焉冬日之至
禋祀于圓丘百神受職穀以降命渙之大者也夫宗
廟虛危之正位也四海之內各以其職來助祭渙之
大者也聖人尊祖以配天是故傳曰先王以享于帝
立廟經曰王假有廟皆以天子所居建神位焉居不
敢康是以无咎也聖人爲天地主爲山川主爲鬼神
主爲宗廟主心無爲以守至正齊明之象蓋取諸巽
也巽者齊也使老有所終壯有所用幼有所長鰥寡
孤獨廢疾者皆有所養男有分女有歸王者以大號
渙而天下得其願焉齊之至也商頌曰至于湯齊所

以假上帝而式于九圍也中宮天極其一明者至尊也旁三星三公或曰子屬前星爲太子後星爲庶子句陳大星正如餘爲後宮之屬六三曰渙其躬无悔凡在臣妾咸有致身之誼矣六四曰渙其羣元吉渙有丘匪夷所思正如適子大臣之道也以其羣共主職渙其羣合主德丘也若可踰也而不可踰則匪夷所思也衆妾衆子衆臣有等夷之心則並后配適兩政之亂成矣渙之四則能絕其思故元吉焉牽牛當未濟中子師逮于困未濟之蒙曰震用伐鬼方三年有賞于大國師之坤曰在師中吉无咎王三錫命河

鼓爲天將左旗右旗桴鼓天馬下及犬籛皆軍旅之物也王者用師以懷萬邦軍至其國三旬而民不聽則還自修德兵故不可宿也地中有水謂之師澤无水謂之困天田羅偃九坎物土之宜而非戎車之利先王以是經井牧比民人時務農間講武困之二曰征凶處之而荆棘生焉旣罷而年穀不孰欲無困得乎北宮之政男耕女桑以生民焉其亦可矣上帝之犧牲寢廟之芻豢皆在牽牛傳曰利用祭祀受福也七公天紀以謹庶獄非司寇自劓刖人人自得罪然王者之志未得也國土之刑人也不虧體乃徐有說

矣南斗漸於困遯次蹇次斗以褒賢進士稟受爵祿
且天廟也古者嘗禘之事發爵賜服龍旂十乘大糝
是承故其象曰朱紱方來利用享祀天子祀上帝諸
侯會之受命焉主世而憂民者惟大人金車以載之
赤紱以章之匪曰安榮之也一民不出於困馳驅而
往焉盛容服以親勞苦命在養民能致之志在行義
能遂之矣古者大夫七十而致事斗見於南方有縣
車之象而農丈人者田事也故曰肥遯无不利讓後
人於丕時无所疑也是以旁求俊彥啟迪後人王者
之嘉遯也旁招俊乂列于庶位上相之好遯也斗爲

相位蹇之二當之矣有天子之事占于斗蹇之五當之矣夫孰知遯之不忘乎民與蹇同實哉不果而係果而飛利在天下不私一身也困之時有言不信蹇之時不言有厥咎下苟困則上之仁言奚爲已爲人臣者殺其身有益于君則爲之鳴鴉以詒王欲王之反身修德也

艮貞孟春上應建星建星建諸生也艮者生也小過爲臼杵斗與箕表焉春橐有等貴者裨賤者疏憂深思遠故其畜積足恃亦用過乎儉而已先王務穡而勸分春頒之秋斂之近賦總銓遠賦粟米旬服之外

無輸將之役脩其委積以待大用雖有師旅不聞饋糧其養民也均其制禮也節藏於倉廩不若藏於困簾之爲利溥也寧有隸農終身耕耨旣穫而不食向走集謀饗飧者乎謀之曰杵之間戶足矣漸在箕旅次之箕爲後宮精五飯縫衣裳婦人之宜也古者祭祀賓客喪紀女宮之戒具酒漿籩豆以上逮於粢盛皆后妃嬪婦之所躬親也斯女歸吉乎外內朝冗食者之食其爲人也多矣行浮於名人浮於食則皆君子之志也斯不素飽乎用自播揚則爲口舌小子之有言也童子備官未聞至教往往輕言天下之事聽

之若可喜老成人謝焉而實孩童之以憂爲謔也懲
之使知厲讒說無由作矣嗟乎小子不可不厲懼其
進之不以漸而躁也津梁不通而獨爲匪民征夫之
不復也御寇非蠻貊乎旅非敖客乎捐親戚去墳墓
士君子之所不得已也古者仕不越邦有故而去大
夫待放三年而後行不說人以無罪實不使罪麗其
身而逃之也是之謂以道去其君然且以喪禮處之
朋友皆相弔也載贄以出疆而不得譏其急雉所以
爲贄也一發獲之以進見於君淡言可以託國先論
可以立功譽命之集必要其終所謂明也尊德樂義

而忘人之勢古之人苟嘗不遊乎動而不窮其天籥
歟多言不如守中也卑而不可踰其河海歟善下故
爲百谷王未有能踰之者也瑣瑣若斯則何不踰之
有志窮於失地之厚而身災於襲火之察也謙以卑
牧咸以虛受地中有山而山上有澤海隅以往地之
法然也有子孫之祥令聞不忘而子孫繁育君子之
終若此有夫人嬪婦妾之位庶嬪違而事上靜取女
之正若此咸之感人心也奔走天下主者不言而人
人願進其說輔頰舌之感勿藥之喜其小者爲章祝
巫官非聖人之所貴而亦不廢也女巫祝掌祭祀

主藏身
禱祠以除疾殃饗浴招弭以除疾病邪慝者不得作
則制以豕宰之官故也箕與斗爲漢津尾與箕爲析
木謙也咸也无妄也屯也皆應於龍尾頤逮於心而
表大火以屆震焉

震貞仲春上應大火大傳曰天地之大德曰生聖人
之大寶曰位天地之仁氣在東方當震而出心爲天
王所謂帝也故名曰大辰太子庶子本與支也與尾
連體居子臣之節以尊君親親无妄數世子而屯建
侯本支百世天所以祚明德也屯曰勿用有攸往可
奪嫡乎无妄曰不利有攸往可代政乎往何之矣天

命不佑勉之以行朝於廟而求助焉閭閻遭家之不造而未堪多難也其志敬且哀可以爲子矣兵刑之任君與國政圖之房四星爲將相其南從官積卒車騎天王之兵衛也平星折威頓頑天王之刑官也不以學世子况庶子乎房心北爲天市王會其期則刑人赦有帝坐焉王建國后立市祭以陰禮而不得過也下臨尾箕焉是與大微爲左右前朝後市之象也少微處士以太學養之在大微之西宗星宗正宗入血脈之臣在天市之方右賢左戚之義也靈臺明堂辟雍次於帝廷大民少民外戚之家在軒轅之位賢賢

易色之志也自東正以至南正觀天之所前後左右而王者之法備矣聖人觀象以爲民紀貴民而寶穀農官在東郊稷掌之房心尾也虞在西郊益掌之婁胃也隨山濬川險阻旣遠乃奏艱食屯以經綸后稷之所經緯也古有虞人之箴以戒禽荒而修民事六三曰卽鹿无虞惟入于林中君子幾不如舍益之以儆戒無虞也殷之高宗舊勞于外世子之教非獨敬學親師云爾暨小人之艱難爰知其依卽我多子罔不開於民之麗故能永享年壽而長世有道也不然者恃富以汰侈憂貧而聚斂榮號之徒安知大難

乎夫農之言厚也易困難足不可不厚屯難也厚也
貼於危亾而上不省憂則大家巨室兼有之若一民
養二君然日削月浚雖有存焉寡矣屯之傳曰屯其
膏施未光也頤之傳曰顛頤之吉上施光也斯亦農
官之大戒已飢者民之阻也放僻邪侈作于身寇賊
姦宄乘其心甚可畏已故曰虎視眈眈其欲逐逐人
藏其心不可測度牧民之道務在安之安民之道在
得民心而已明主知其所欲而與之聚之知其所惡
則勿施也民歸之志神降之福故曰由頤厲吉大有
慶也民謂尾爲犁星自无妄而耕穫菑畲之象見特

未富也耒耨之利必取諸益當農祥之正位損上益下民說无疆神農之所以爲神也小過能儉頤能廣頤以養生大過以送死益備而有之初爲大作平九土而降播種也二用享帝賦貢之本主爲祀天而天子乃受其胙云爾三用凶事以給喪戎用圭以待賓客四利用爲依遷國乘王氣擇瘠土而居之儉宮室小寢廟不爲常寧以謹天命唯五曰惠心斯不費之美也美哉屯之經綸與天地並頤或拂焉持之者在上而養之經可得而正也天子有田以處其子孫諸侯有國以處其子孫大夫有采以處其子孫卿大夫

三士下及旅食食於其官以食人多者爲上秩人足供其事祿足養其人而已不以一人盡數人之食也農夫爲本凡在九職不作無益雖有等差皆足以事父母育妻子貶食省用以致畜積治國三十年則歲不能災自上以下富不至於驕貧不至於約是先王承天地以養人之大經也其可拂乎迨周之末頤之道大悖矣民食於他君莫之與傷之者至泣血其何及矣東方者五穀魚鹽財貨之所阜也上當天市有諸國之象環之矣古之爲市者致其民不利其貨納賈以觀所好惡辟則正焉故害者以靡者微風俗成

而事用逐噫觀天之象市與獄錯居聖人皆著之噬
噬民以貨獄死焉而不畏自古以然聖人絕之以不
言遠之以不見夫子告哀公曰昔之用民者由前今
之用民者由後夫大微三光之廷五帝之坐三公九
卿諸侯大夫左右執法君子所職義之教也由前也
天市之都日月不行焉市肆帛度斗斛宦者市侯天
弁小人所知利之化也由後也南面而王天下苟以
利化民則小人必將賢智乎君子獄不勝罪刑煩而
徵見於市先王明而敕之亦先義後利而已矣復以
至日閉關商旅不行靜天下走利之心而動其不忍

也啟於外則震曰喪貝閔于內則豫曰重門外以息
人欲內以瞞天明者復也苟爲後義而先利則迷焉
天以生物爲心復之坤聖人辨以爲仁先覺者君道
坤之謙聖人尊以爲知代終者臣道謙厚之至而復
其庶幾不遷怒不貳過無伐善無施勞唯顏子能之
或以仁爲愚則敗或以知爲蕩則薄不好學之蔽也
夫烏知知必發於厚而仁必成於幾也哉氏爲天根
而復應之天根主疫无妄之疾也巫可除則藥不可
試非聖且敬以大亨而正則君臣父子之倫不得盡
其理矣動而以順行剛出入而柔不能爲之疾也氏

爲宿宮上有天乳是知腊毒亢爲疏廟主疾東咸西
咸鍵閉鉤鈐皆所以防淫佚也初於噬嗑暨於隨係
亢遇龍角表大過焉天門上也地戶下也自乾至隨
自履至大過上乾而下兌履之傳曰君子以辨上下
定民志不可易也夫大過之中爻實互爲乾而初上
皆柔也天爲剛德猶不干時故曰高明柔克非有大
過人之才不能慎斯術矣孟子曰惟送死可以當大
事聖人取諸大過夬爲絕氣而藉以金玉則終有凶
焉不若茅之薄也用之可重蓋孝子仁人所以藉手
而盡於人心乎於文卯爲出門酉爲閉門震兌之合

隨爲出歸妹爲入不可不察震在外兌不能閉而聽其入震在內兌不能閉而聽其出外故入內故出是以至日一歲之復也嚮晦一日之隨也其入而息固所以出也若其晏安則鴆毒而已矣夫出入飲食哀樂之事疾實生之晝選男德以象穀明宵靜女德以伏蠱隱隨者蠱之正反所以伏蠱而慎疾也夫人肖天地之兒食穀而明者也生而不具者五日無見不能食不能行不能言不能化噬嗑食也噬膚食之始遇毒失其正也食君子子者三年而出阿保之微擇且卜焉慎不敢忽柔乘剛賤乘貴鼎之妾以二爲子

噬嗑彖子以二爲保或從貴或乘貴過矣可不補乎
無法家拂士惡能正之或詭隨焉苟合而已本實先
撥則明堂之精胡以消伏變異乎我觀於隨而知化
陰以陽化陽以陰變是故男二八其施行女二七其
化成小節合於三大節合於五聖人以昏冠之禮親
成男女不可過也天地之氣不致盛滿不交陰陽是
故男女體其盛臭味取其勝居處就其和勞逸居其
中寒煖無失適飢飽無失冲欲惡度乎理動靜依乎
性喜怒止於平憂懼反之正中和常在乎其身謂之
得天地泰夫生莫寶於氣而心氣之君也何爲而氣

不隨也氣不傷於以盛通而創於不時天并不與陰陽俱往來謂之不時恣其欲而不顧天數謂之天并君子養而和之節而法之去其羣泰取其衆和故曰孚于嘉吉物莫伏于蠱莫嘉于穀不饗穀而食蠱則疾不可爲也伏蠱慝而章穀明其孚于嘉者乎於二月也綏多女士嘉耦曰妃怨耦曰仇先王以陰禮教親而民不怨故合男女頒爵位必當年德慮民之怨也爰得我直亦無苦焉雖然天地之大也人猶有所憾則過以相與者有之常人之所謂小過聖人之所謂大過也夫元臣宿齒欲盡則雖新進弱植猶將以

後事屬之老夫女妻其若此乎能不負付託无不利
已大臣秉事歷數世矣人主春秋方富明習國家之
事無周召之德而久於其政亦可醜也亢爲內朝摠
攝天下奏事隨之初曰官有渝古有五官以正五行
東方尙仁南方尙智中尙信西方尙義北方尙禮順
而布之以從四時木正失爲姦火正失爲讒土正失
爲佞金正失爲賊水正失爲亂五官者相生相勝治
亂之所由作故曰元亨利貞无咎則敝敝則渝渝而
從正則吉矣不正則凶矣官修其方然後五行得其
性庶徵得其時水官棄矣故龍不生得象龍御龍虞

夏有之矣然則如何而官正曰養民而已焉養民如
何曰隨時而已焉時者天之爲也官者天之有也以
生民生物而致成之天之意也知恤者自古鮮矣天
有四時時三月王有四選選三臣三公聖人之選也
三卿君子之選也三大夫善人之選也三士正直之
選也所以選於男德者如此天以十二月相受而歲
功成人以十二節相持而形體立官以十二長相參
而事治行官有偏任猶體之有偏枯也左動而右不
隨官之有渝渝其偏任者也人君之職能使百官之
隨若百體之隨以行仁禮義知之心而保四海則王

道成矣百官同極而異任一之者在主帥之者在相
相國之棟也大角爲天棟正經紀左右攝提主建時
節隨時之所以爲大也其北梗河招搖元戈達於斗
杓謂之外廷其南庫樓衡柱兵甲之府陽門以守塞
南門爲外門大正之所取法也剛氣所建至正達而
回邪莫之敢亢善人以興亂人以廢故曰剛過而中
巽而說行利有攸往乃亨隆則吉天下偃兵撓則凶
魚潰而輻分矣處堂者誰乎不求大木顧束小木爲
之過之大者也天門進賢升之見大人也周鼎帝席
鼎之養聖賢也自古祈天永命必有稽謀自天之人

謂其德能以厥下民升聞于上帝也民者神之主神善承於天行舍於地有嚴威焉地載萬物人履而居之親而不尊是用山林不封川澤不虞日以私褻侵越神祇之位積其不蠲烝而在上神恫弗保降戾於民斯實主命之憂也苗民之亂罔有馨香德紂之亂不虞天性不迪率典慢神也多矣文王自岐修行政教六州之人有貞信仁厚之俗焉河淇以北尙未革也微子作誥哀其上下多罪合於一矣武王勝殷立武庚須暇之也不可念聽商奄之猶易管蔡之薰五年而俾之作狂可不大哀懼乎是以周公告康叔曰

爽惟天其罰殛我我其不怨傷其無度之民罪至此
極也夫咸劉之罰太公之義之志非周公之仁之心
也文王之升民以順事周公之升民亦惟以順德作
新大邑誥告而治焉柔以合天下之志而大得其志
是以公之東征後至則怨若弗克見周公也公在成
周民懷其德弗克由聖者鮮焉其書曰至治馨香感
于神明萬物之潔齊在此矣故能迓續庶殷既絕之
命而繫諸天端天之所若公面稽焉夫文王受命寶
命也斯所以及天之行基而定之也故曰鼎玉鉉大
吉无不利不可以知其正位凝命者乎

巽貞孟夏恆應軫轄而蠱次焉是與翼爲鶉尾之井
之姑之明夷而重離位焉左大微衡也右軒轅權也
張七星味鶉火古火正之次也傳曰齊乎巽齊也者
言萬物之潔齊也依斗杓以上下於天人非齊于至
潔則陟降左右之路絕矣奎壁初也角軫終也巽不
爲初九五曰无初有終以是爲天地之初終也角始
也軫終也終則有始蠱與恆皆著之以是爲天星二
十有八舍之終始也傳曰有夫婦然後有父子恆曰
制義正夫婦也蠱曰幹蠱明父子也雖有聖父必有
未竟之志法五行之相受皆奉承而續行之故曰孝

天之經也王者事父孝故事天明事母孝故事地察
繼天地以有事者蠱也事莫大於蠱慎哉蠱之言元
也元亨而天下治以孝治者也五帝之坐五行之精
更受命而王王者繼大敝之後亦曰幹其蠱而已矣
能明其世謂之天之子殺一無罪非仁也非其有而
取之非義也雖得天下有所不爲此聖人所以立常
而飭事立常則不易其方飭事故振民而育德焉恆
不可振蠱不可不振有改制之名無易道之實也大
微治朝也紫宮路寢也北斗爲樞機泰階爲六符文
昌爲會府紫宮象坎大微象巽其卦曰井會府位上

樞機位下其卦曰姤井之繇曰改邑不改井五帝更
王不常厥邑而其長民也若網在綱而不紊以常舊
服正法度焉夫法度大微之所出也井以辨義朝極
辨辨諸至潔而已矣路寢之室不齊不居焉誓御之
臣皆士大夫婦寺不至焉建路鼓於大寢之門外以
待達窮者與遽令樞機周密示正路也正其誼不謀
其利明其道不計其功无喪无得夫是之謂至潔於
是乎聽朝以臨百官左右執法位于端門以善能敬
正法辨斷六官之計三之渫乎五之列乎其廉乎泥
則舍之矣渫然後脩之列然後收之九仞而不及泉

猶爲棄井汙至亦未繙井功不加於百姓爲王心未
加焉明而成於在上福其可量乎具乃貝玉總於貨
寶井泥之不可食也其惡易觀而陳于茲者不能知
用永地於新邑則舊井可舍也夫勞民勸相故胥匡
以生也不外求而上下皆足好貨者入險而凶勸憂
而先惡焉井養人斯不窮谷自養乃无與矣井之上
收也茹之初繫也象皆應於斗斟酌元氣詰於四方
一闔一闢其樞機乎勿幕言無私也故以勞天下金
柅言不褻也故慎其所溺不信其所賤井之五曰寒
泉茹之五曰以杞包瓜寒泉親賢臣而自中益者也

瓜者在外而藟蔓歸之非中正孰主之乎羸豕之孚其欲不可足也彼且自爲主於內聖人外之而勿取主乾而役之冥冥乎其無下矣號之曰民謂其無德於天地之間也夫民也以寡言之則庶人者卑稱也以衆言之則民數者重事也惟天陰隲下民而聖人步於上帝天居高聽至卑聖人不遠民而志不舍命以五聲出納五言妬之五剛皆賢也賢積於其主則上下相制使勝殘去殺畫象而民不犯斗之威神矣所以達於上下也三能六星兩兩而居起文昌歷抵大微爲天階上階天子及其后也中階公侯卿大夫

下階士庶人也上爲司命中爲司中下爲司祿以開
德宣符和陰陽而理萬物也天之道無虐犢獨而畏
高明含章中正則有隕自天王公可以戒愼矣下陵
上替不說學者實使之盍仰觀於泰階之不可踰乎
乾天也巽命也姤之爲卦天命也受之矣庸可釋乎
哉天表之應六符不可以不省三階平則風雨時事
者民之風雨也乾天也巽風也天地相遇合以生風
而品物咸章也姤至大過象八風八音以遂之辟雍
之禮得則大微諸侯明辟雍少微也古之諸侯皆國
子也國子爲學士而處士議士博士大夫之位皆在

少微大司樂合子弟於成均而司其業有道者有德者爲父師而司其成則處士議士博士象之死則以爲樂祖祭於瞽宗記所謂祀先賢於西學也有虞氏以典樂之官教胄子工以納其言聽其聲之吉凶察其志之邪正以知其人之格否故人不能匿其情焉讒佞可得而遠也春秋考成敗錄禍福譏世卿最甚故曰於其無好德汝雖錫之福其作汝用咎以此爲上帝之大禁也不可不畏雖然父老子代從政父卒子未命亦皆譏之是以國之子弟旣成德矣學於師氏教以國中失之事掌於諸子國正弗及蓋不命不

專官以是爲周公之典也夫樂德樂語樂舞六代之所作皆教於辟雍矣少微也故曰於論鼓鐘於樂辟雍而樂府則翼主之樂天子之職也省風以作樂不中於德音則不以共御組瑟而稱不習矣而青丘東區以南有器府是邇天廟亦去其淫過凶慢之聲而納之大德廣之所及而省四海之風也南宮之文治盛矣裨冕搢笏而虎賁之士說劍師氏保氏宮正宮伯庶子之官常陳郎衛之設皆禮樂之選焉天地四時之官屬三百六十常吉士也無不學者靈臺以觀象明堂以聽朔辟雍以養賢其象在天廷之西隅三

雍之宮在天子之郊文之至也革之豐曰大人虎變
未占有孚其之同人曰君子豹變小人革面革之時
非尙武也必先文德非文武之君周召之相孰能與
於此夫革之爲象火勝金也定三革偃五刃非明不
克明至則懼其傷於物不可不用晦也夫不明而晦
斯失則矣不用晦而明斯疾貞矣武之遲久未能無
所傷而酌其莅衆之養於晦也古也有志天明則日
月不明至尊之位在北鄉明而治者其率用此與靈
臺天官所以治歷也明其時而布之於明堂以和天
人莅衆之常經也國作大事則致萬民於外朝而詢

之小司寇辨其東面西面北面之位以敘進而問焉
革言三就蒞衆之大權也明夷誅也司寇明辟必三
刺故曰國人殺之用晦而明天子所以爲公論之主
也百世雖遠是非久自定公論以遠而益明必不可
得而誣彼以其私意度古人以爲皆無足信者聖人
之明或且爲所夷非愚則誣蓋誅絕之罪也論語曰
人雖欲自絕其何傷於日月乎

離貞仲夏家人應軒轅朱鳥者禽也作結繩而爲網
罟以田以獻蓋取諸離包犧氏以道揆法而教民守
之之謂作尙象莫先於此膳夫甸師之職大宰小宰

躬領治之而不以大夫爲之長臣子之誼所以致養
於君父至尊至重而后及世子之奉養亦統於一官
不爲私造聖人之法遠哉上以共承宗廟天地下
以奠安民物使各得其宜神明之德通矣張爲天廚
七星爲員官味主尙食和滋味味南有外廚廚南天
記知禽獸之齒上帝之好生也如此燿主火酒旗主
享燕積薪供燎積水供濯天罇給饌粥自張及井官
與物備焉而奢淫者鉞之所司也惟辟玉食戒之在
儆矧在臣下敢僭以侈乎井之需曰舊井无禽其棘
則是其鴟安在僭侈之禍乘以寇戎天之斷棄其人

其人且亾而况鵠乎盤庚改邑殷民所以追思也姤之遯曰包有魚无咎不利賓其之巽曰包无魚起凶魚者民之象也可順不可逆三牲之俎魚腊不與故不利賓子必私其父臣必私其君民必私其主而柔焉九兩之所以爲繫者不可以參義不及賓也賓有之主反无之二之魚四之有則人之倚乃身迂乃心使之凶之所由起其不以此乎明夷之謙曰明夷于飛垂其翼君子于行三日不食有攸往主人有言其復曰明夷于南狩唯其時物有田獸脯腊賓客酌醴之事焉張爲喙中虛故不食翼爲羽翮故曰飛而垂

其翼夫飛鳥夕棲而鄉晨則起因於明者也故象於
離或主觴客或主遠客故有賓主人之辭焉不食之
義明而順也弗乘之義明而止也剝剝啄啄客急而
主人應之也緩彼有言在旁仄而先入矣七星主急
事行不暇食可謂急已六二之拯急天下之民也拯
可急也貞不可疾也文王在難入左腹而獲商王受
之心者闔天散宜生也方其未入也匍匐以赴難垂
其翼也行則往往不食三日不爲多雖雷開費中之
屬必將因之以爲主人詆訶所不恤矣嗟我君子義
固如此明而順者文王及其臣子也于出門庭而順

帝之則矣無好無惡不忌不克雖聖人亦以動心忍性而後全之乎軒轅家人之位南大星女主次北一星夫人次諸星次妃之屬女主南小星女御左角一星少民后宗也右角一星大民舅族也二曰無攸遂在中饋貞吉五曰王假有家勿恤吉詩曰大邦有子覩天之妹天所佑之家必立厥配而固其命后夫人之行慎固幽深通乾流坤侔乎天地非人力所能致而自致也商頌立鳥周歌生民推原天命皆自郊禘位於南宮以配大微爲天下父母垂象之尊嚴若此可不敬乎輿輿也柳輿之飾也衣裳文繡布帛金玉

有馬有兵胥積於此富家大吉積而能散則庶乎盈
且實矣中白者爲質謂之輿鬼豐次賁次愛勿恤也
大勿憂也王假之也天下歸往謂之王宜之於假以
天下爲一家明照萬物而不遺微小又何蒞乎豐之
二與四則其蒞也三其沛也上其屋也內蔽於妻妾
朝蔽於相室近蔽於左右遠蔽於諸侯堂下有事十
日而君不聞是則可憂也主賓之遇不過旬日畱賓
政之災也伯父無事歸寧乃邦頒瑞而遣之請事也
則右袒折其右肱相室也夷于左股侯氏也造請室
而請罪大臣之誅乎股肱之虧也土木之崇乎吾懼

其不安人也賁其車曷若賁其趾乎聞其无人母乃鬼瞰其室乎白之爲質也在豐則凶以賁則无咎觀乎人文以化成天下周尙赤也文也殷尙白也質也駟騶彭彭上周而下殷也亦白其馬統承先王脩其禮物也賁之四曰賁如皤如白馬翰如微子之客也儼然當位是亦一天子也得毋疑乎我匪寇也彼婚媾也在彼在此終无尤也且周因於殷禮肇稱焉太平而後有制作曰求厥章文固未嘗勝其質以云救也非以僞采淫泰而陵人也而人亦莫之陵被服成俗而以爲賁浹於肌膚臧於骨髓而以爲濡永貞之

吉無射于人斯以俟後聖而不惑矣雖有蠹滅古法者終以自廢而孰能陵之乎豐之傳曰折獄致刑而賁戒之以无敢質司殺者也有司之人必不可以代之如有敢之心則以身與其間出乎爾者反乎爾者也人亦有言失禮則刑從之其不然乎其不然乎我以禮教汝汝必無怨惡以律治汝汝何所措其手足小者可論大者可殺也且歸念之允哉允哉長者之言乎果若人言失禮則刑從之無所措其手足者乃卽在禮尙何必無怨惡之有論語曰禮之用和爲貴由之而不能盡則有所勸勉愧恥以行其言風俗旣

衰矣尙猶顧畏當世之清議其不以刑從之也決矣
以禮教汝者司徒也以律治汝者司寇也司寇之獄
訟重之以束矢鈞金不直不實不可但已司徒之獄
訟阡陌閭巷便則訴之聽之斷之自作不和爾惟和
哉爾室不睦爾惟和哉雖曰附于刑者歸于士然亦
罕矣此周公之以人道治人不以已之所不願而施
之於人所以師保萬民民懷其德也夫刑者聖人之
所措殺者善人之所去而豐顧致之何也制官刑儆
于有位也三風十愆邦君卿士有一于身則其不匡
之臣服墨刑而其君之罪可得而知也盤庚之誥不

吉不迪不恭則顛越之姦也宄也剿殄滅之而卒也
告爾朕志罔罪爾衆非明致之於始誓則慶譽安可
矯乎周官小宰非刑官也而其職則建邦之官刑自
治朝以至北宮皆以正月之吉憲刑禁焉致刑之謂
也天子之尊不敢以意出令行事而一守乎先王之
法度有未當則百官各以其官守伏死而諍之陳善
閉邪敬君之大也故曰畜君何尤齊景公燕而有僭
賞令三出而職計莫之從怒而免職計令三出而士
師莫之從齊猶有守官之臣若此保傳之傳曰史之
義不得不書過不書過則死膳宰之義不得不徹膳

不徹膳則死是天子不得爲非也其所由來者上古以然而皐陶明焉成湯倣焉故子夏論知人而獨以皐陶伊尹爲直謂其能正百枉也千品萬官不可以一衰人錯乎其間謂之正謂之齊而毛公之傳曰后夫人有女史彤管之法史不書過其罪殺之詩曰悅懌女美美其以赤心正人也南宮主權衡小宰爲執法傳曰勿憂宜日中宜照天下也豐所致者成湯之典刑也天地盈虛與時消息而殷周以之長有道又何憂乎旣濟也同人也萃也在鶉首之次東井爲水事其西曲星曰鉞鉞北北河南南河兩河天闕間爲

闕梁與鬼鬼祠事也文家右社稷而左宗廟天廟在
左天社天稷在右詩曰乃立冢土戎醜攸行狼弧參
伐以次而西弧爲天弓言萬物之吳落也狼爲盜兵
言萬物之可度量也德成衡井以爲地王明則並受
其福矣觀成潢剝有觀象安宅之驗且民所載也故
爲五車傷成鉞兩戒爲天下之防萃之除戎器戒不
虞乎禍成井同人有伏戎焉萃與旣濟皆有亂萃以
亂始濟以亂終故曰思患而豫防之又曰終日戒有
所疑也誅成質則豐之折獄而賁戒之以无敢者已
賁之二曰賁其須濟之二曰婦喪其茀須女之卑者

與適偕行不飾則不敢見其所尊貴夫德成而上藝成而下古之論官也祝史射御醫卜及百工與凡執技以事上者出鄉不與士齒士以尙志爲事詩書禮樂是習仁義是脩不藉于資質有餘也夫執技以事上則安可以不資一心營職以求親媚斯亦卑賤者之興也與上而不使之踰上踰而僭離而倍抗而戾蕩而惑則敗矣資往而濟止婦喪其弟可以止矣君母出門則乘輜駟下堂則從傅母進退則鳴佩玉內飾則結綢繆此自斂制不縱恣之義也雖然婦人無外事傅母不在不下堂可也輜駟不備不出門可也

喪其第矣無不可以止者奚以逐爲七日得之所以
自藩蔽者不徒在第矣夫君子之仕也獨無第乎聲
聞過情人以爲行君子以爲止亾其所以自蔽則惡
其文之著也矧可露才而揚已乎彼皦皦易汙非大
白也殆爲風塵之所襲其喪第而行者已然則貴若
辱者乎貴不緇者也第乎第乎君子之所不可及者
其惟人之所不見乎夫又何喪喪又何逐又何得吾
非斯人之徒與而誰與見其與人謂之喪其第矣見
其辟人謂之得其第矣夫聖人則以中道自濟也鳳
鳥不至鳳德未衰接輿而歌夫惡知時夫又惡知權

六位皆當唯二爲知時南宮朱鳥軒轅則其權也君子之所爲衆人固不識也旣濟之明夷曰東鄰殺牛不如西鄰之禴祭實受其福萃之困曰引吉无咎孚乃利用禴禴用圭璧更皮幣春之時也殷禮也時未可以殺則不如不殺之時時未可以吉則不如不吉之孚祔於墓祔於廟皆象乎萃以虞易奠卒哭曰成事生事畢鬼事始興鬼者鬼事也天神人鬼地祇之禮斯謂之吉禮享先王者六焉所謂吉圭而爲孝享也乃本其祔練祥皆以哀薦不自云孝猶未變云爾禫而後曰吉祭去凶而卽吉易哀而稱孝矣春秋書

吉禘于莊公言其未可以吉而吉也蓋變除之服其成文理者於是始棄引之爲言也有漸有文不陵其節其夙興夜處不寧不惰其身以離於寒暑之數期而小祥曰薦此常事又朞而大祥曰薦此祥事既中月矣志未嘗以爲可以吉也俯而就焉爾而後乃今引之而之吉焉思慕未能平焉此人所受於天地之中也未變也雖終其身何變之與有祭之日樂與哀半文王之祭也事死如事生思死者如不欲生王之孚也下土之式也孝思以爲則也禴也物薄而志厚用之則其利成况備物而享之乎是故引吉之志志

哀而居約與之知喪志敬而節具與之知禮上殺下殺旁殺而人道畢所以羣居和壹之理著矣愛親哀喪而後可以用其民不然阻兵而安忍則戎器不可得而除也司徒主民司空主土有土而無民則社未可封也故社以衆爲本衆以社爲主夫根著之徒在地而呼吸應感靈屬於天上帝實引逸焉養之以之福則吉敗之以取禍則凶沃土之民不材頻於澤而漸於說三之所以爲萃也不患其志行之少恥也而患其衆之不足也萃如嗟如以樂怙憂姦人幾幸衆心疑惑可爲太息尙安所利往附於有德返廉愧之

節仁義之厚无咎矣比事臣我宗多遜而放心未易
閑也既濟之伐有小人焉同人之克有伏戎焉天狼
之可畏惡也天弧直之且吳落則將盡量度則將斷
先號後笑愛其同類也若號爲笑以亂得聚也萃大
有廟天下宗之以萬國駿奔走焉故大也宗吾之同
本者也兄弟具來而又於其中同人焉以爲親其親
而益疏其親庸愈於獨而畏者乎太姒之子唯周公
康叔爲相睦而不爲吝封建親戚以藩屏周管蔡且
猶不絕其世故周以宗彊也夫懲而毖後患亦幾於
寒心銷志矣齊咨涕洟以哀之閔管蔡之失道也夫

萃之有位據天下之上而未嘗以一日安九州之牧
五等之諸侯惇德允元以屏翰天子而不敢以其位
爲當天下之人之衆欲其一之乎天子而不敢以爲
私畜焉是故庶人爲國君服如族人爲宗子則是不
敢專其民也同人通天下之志而類族辨物天之生
物也使之一本不辨則不可以爲同萃有分土無分
民聚以正同人以君子正文王研諸侯之慮而周公
以之勤施於四方也夫東井山河之上流也順天命
以征撫諸侯先郊而後伐武王繼之周公成之而文
王之志得矣

坤貞孟秋上應東井晉爲康侯五諸侯之象也主帝
心而察失得明大潤澤則天下治人主自昭明德以
師友爲康侯定疑議戒不虞三公大史博聞之士理
陰陽慎刺舉雖有失得因而明之因而斷之奚侯恤
恤乎安不忘危存不忘亡勿恤以爲休也觀次豫次
天闕象魏也紫觴參伐直天闕表重門也夫諸侯述
職而天子省方觀禮侯氏至于郊勞問有數且賜之
舍束載者墮矣摧如也不敢自解惰有至尊者不敢
貳未有帥乃初事之命王臣罔有私交焉者懷其忠
敬裕焉而已旣受命乘墨車以入王門以其命圭覲

天子撫之愀如之容畏敬之至也三享以其國之所
有三接之儀皆延之升晉晉然而循柔進之謂乎夫
上之不虛取於下也必錫之福天王之母弟甥舅而
又有明德則諸侯莫敢望焉其子孫嗣侯加以親親
之恩數十世之後猶將賴之是故摯疇之國由太任
杞鄩由太姒齊許申呂由大姜陳由大姬甥舅也大
王文王之昭王季武王之穆周公之嗣兄弟也天子
外內宗之親莫不師象於大姜大任大姒之聖度以
教訓其子孫蓋自勝衣趨拜而受福之基定矣奕世
相承而無或有地害之讒勝之之禍究其本原則不

第視其祖考之功德在盟府也大壞門牆元功也可保乎貽釁嗣君恩澤也可久乎苟有逮及遠見之明以庶幾乎戒懼者莫若研幾於受茲介福之中正矣六官之灋縣于象魏使萬民觀之中正以觀天下也夫巽者天之神道四時之令以是觀之而不忒日次于巽以陽德制生殺故曰設教而天下服十二年而考制度于四岳詰戎兵以陟禹之迹有指疆土皇天旣付之先王矣可弗觀我生乎夫權衡平理之道不得則賢能失官爵功勞失賞祿士卒疾怨兵弱不用是日不平不平則飭司馬司馬主七將參七星也皆

明大天下兵精觀天下爲人牧者之生未有若我之
靈承于旅者九伐之柄其未可以不自我出矣設教
之本在明黜陟社稷之子俾在畎畝畎畝之人俾在
社稷不僭不濫以上有明天子也平之至也乃方觀
其生不敢有邱夷淵實之心以求其稱稱而隱焉平
之權在我而志無寧未平是以旣平而不可得反也
夫平之不審則如聽其不平焉可靜不可動則如民
之不靜焉非所以順天下也故聖人尙乎以順動豫
也利建侯行師也夫本大而末小是以能固建侯之
象京師爲諸夏之父母震於外者百里而止爾東井

案據南北河以爲之本居天下之上流而諸夏委輸焉豫之至也觜觶爲候人葆旅收斂無遺物焉行軍之藏府行數千里而無遠輸之勞夫乃可以行師采衛之服職卑而貢輕專其有餘之財之力任爲天子奮武衛蠻夷君長莫不震而攝焉其戴天子實以爲在天上也其誰敢褻則唯采衛之信有餘力也無事不內輸則有事不外輸伐所以能爲尉而軍市無貴儷豫之至也若夫方三千里之內有征伐之兵矣有攻討之備矣王賦十乘以先啟行其車三千裒荆之旅而非畿甸之民也詩又曰整我六師以修我戎所

謂大合軍以行禁令以抹無辜伐有罪然而天子之功有常德以立武事不畱不處三事就緒見王道之大焉禹之制貢賦也八州皆達於河或至于南河或于西河或則東河此三所者儲峙之久矣以待天下之諸侯也會同于天子天子各順其方以綴之所謂殷國也若諸侯朝覲必受于廟至于天子之都而河陽踐土則以爲失其所者也巡守至於四岳朝于明堂天子道河以周之者三幣帛饗飧饗食膳獻館舍委積百官官以物至古之用財如此其厚者則以其制貢之薄積之於諸侯者多也其諸侯相爲賓諸臣

相爲客王使之出入行理之往來靡不有以待之則
靡不有以厚之其常也固如此天下無事咸盡之於
禮矣天下而有事若禹則決江疏河若周公則東征
四國三年八年其動天下之大且久也如此可謂非
常之原而禹周公勿疑者其德誠厚其力誠厚其財
誠厚行其所無事豫之至也而又以開天下之豫得
其志也與民由之得其道也萬物莫不由之可不謂
大乎天地如之矣剝次比次否次上爲五帝車舍天
潢在其中天子之同姓也南曰咸池皆濱於雲漢八
穀在其上達於內階五車南對畢是主邊兵弋獵其

大星天高主四夷之尉附耳在畢天節爲行人九州
殊口爲舌人夫柔之變剛山附於地之象也脈原於
崑崙之邱東爲四列百川理脈絡通則水比於地之
象非乎形附不弛崩氣比不散越然後其民生死皆
有所宅而安著於土剝之象曰上以厚下安宅比之
象曰先王以建萬國親諸侯親諸侯所以親民也治
民之道地著爲本文王之治岐以平土爲法以甸治
地以族治人詩曰百室盈止又曰維禹甸之禹乘四
載舍於西宮菲飲食惡衣服卑宮室用儉德先諸侯
辟百姓之難休天地之否焉非以得其祿爲榮也雖

然爲天下辟難者必畏乎巧言令色孔子比曰匪人否亦曰匪人人情之險阻甚於洪水與猛獸也是以聖人聖之附耳卷舌天譴礪石不祥之人唯讒諂面諛者當之矣邪臣女謁實相表裏於君子之貞曷利乎天子得靈臺之禮則五車三柱均明有常傳曰順而止之觀象也天之行無止觀象者順天以推策必有以止之然後消息盈虛可得而效也是以先王尙之日以分至敘其行平氣而止矣月以會朔五步以晨見皆以日正其端人事象之國聽於君家聽於父而公卿大夫妻子臣妾咸秉君父以爲節小過不

及不敢以爲當然之行聖人以五紀協之和順而不知止則星辰放流而不察知止而不知順則攝提失方而不覺以上爲甲而五子從之紀日者以是爲常也以艮爲極而地平準之揆天者以是爲經也大采朝日少采夕月眡祲以十輝之灋占日而安宅敘降太史司載馮相保章不敢一夕失其職焉故將旦臨朝不牽於色日入監九御使潔奉齊盛剝之五曰貫魚以宮人寵則咸池之圓象此乎女謁之尤玉牀之動也四曰剝牀以膚凶推剝牀之故而箴之曰以膚以天下之美爲親於已可謂切近矣而聖人曰是災

也徵必見於日而山林之變因之天高以望氛祥天
阿以察妖變司怪以聞災脩德四方有敗必先知之
故其下同心載之知其必有以安厚我矣然後靈臺
之禮得而西宮之政協潢之所以成於觀也觀者觀
象也蠻夷者天下之足四衛者天下之辨也剝之貞
安若泰山而四維之若之何蔑之也天街之左右有
先驅焉禽可失也果不可食也東方物之始生西方
物之成熟始於禁暴終於豐財天弓九旂屆于天苑
邊兵弋獵坐旗以明貴賤辨等列順以動者豫也王
井軍井介以屏市四夷有尉丈人子孫以安長老養

幼少順而異者觀也以是觀民可謂和樂者乎故曰
作樂崇德盛威於中國而將帥爲諸侯伊呂之子孫
與商周並是之謂王者之將也天上地下曰否畱所
以閉萬物也日月之所入天地之所比也閉則亂閉
其所以亂則治陰不侵陽臣不干君子不違父婦不
逆夫小人不亢君子四夷不偏中國故曰包承小人
吉順也昴畢之間爲天街禁防設而聲教未嘗不通
來勿拒去勿追大人否閉其門也制御之常道得則
亨矣夫民性陵上者也將母能登天乎狂愚且知其
無有三以偏上姦禮爲羞四以降命離社爲善在天

地之間者胥視此司天者屬神司地者屬民各處其所而不相奸重黎之所以絕地天通也觀者天之神道而否以閉之家爲巫史乃讒賊也中國山川有神靈矣是以人心不惑焉柔而衆者柔之苞也古之人以喻兄弟兄弟失其繫則子孫失其序以亾爲戒愼毋尊而不親也兄弟不得以其屬通天子自爲可乎晉鄭焉依則兄弟之能用力於王室也西方者遷方也車馬致千里晚節末路而不求善所舍焉偏駕不封大輿無輶或乘之而馳其猶可追乎繫乎繫乎子孫千億有田以處之則夫人有待於下流者焉而

不肯遺者驕也大人弗爲也

兌貞仲秋臨應咸池是爲三淵南直天街睽次中孚
次昴髦頭也胃得馬牧內主倉廩外爲苑囿日主街
南月主街北中孚歸妹婁胃之內萬物也奎主毒螫
奎物而藏之損之節之無厭於履上天下澤上不忌
降是謂降婁天在澤上爲履高以下爲基也地在澤
上爲臨用上敬下尊賢之義也古以賓禮遇其臣有
謀則就之於臣爲咸故不專於君爲知故不惑復之
初君道也師之二將位也不可以二臨以二故曰咸
周召以不說爲同心天之道也念我天威戒在不久

矣夫臨之辟在十有二月臨之位八月消息剛長也觀象遷方也遷則有臨死事哀戚之謂與聖人作易通乎晝夜以知死生必吉生而凶死昂之爲會不可諱短喪者賢乎哉知死不可惡然而又嘉之不如聖人斷之曰有凶也元長之通合之義和之貞幹之如是而有凶以喪禮哀之容衣可事况義嗣在賓階乎消不久故大其長以浸不浸則甘而不至是故臨喪詔之以凶知哀也臨祭詔之以吉知敬也孝子在臣位宰自右贊之咸有一德克享天心而不遽告類於帝故曰未順命也相行志不正君受命不俟驟而

不浸大物其可改乎受命之君必遲之遲而又久然
乃格於皇天詩曰昭假遲遲上帝是祗尹之所以左
右商王也大宗中宗格於上帝夙矣然而保衡不惠
伊陟臣扈不贊不义下民其不以爲宜可謂富貴未
可謂聰明則神祇祖考未歆響也五帝相嬗遷以臨
下無過二三十世者人胥曰有天下者莫長焉而聖
人曰消不久也考歲終則知歷數復承于剝七日來
復臨豫于觀八月有凶其序何哉天地以生物爲心
不嗜殺人其祚長焉死者無終極國家有廢興褰裳
去之其所舍善焉不當者以位爲甘當者不以位爲

樂至在臣位亦知之者哉大君內有父兄之臣有法
度之臣有輔翼之臣外有守圉扞敵之臣金城也敦
之以安海內不復于隍矣斯其守在四夷乎志不在
內咎不終无睽之弧矢黃帝以威天下軒轅氏之臺
射者不敢向得其道自外益失其道自外擊愛吾家
乃兼愛異家愛吾國乃兼愛異國愛九州之內乃兼
愛四海之外弗損人以自益也弗損內以益外也厚
之道也彼好厚所薄謂無不徧物以是臨民安所不
薄哉敦有善志知居大節信用仁賢君之大節也如
是而后宜不以爲甘也甘之者不當也歸妹未當貴

賤不相準可反歸也大君使人南面臨官而孩童是
試將必傷手然後更刀或乃婦寺是誨言之大甘其
中必苦長國家者宜先憂之自古所監官闡由是變
社稷由是危天下由是傾海內由是亂故曰不行之
謂臨禍其未知所移矣聖人曰咎不長者既得其所
宜憂也立其當若樹去其不當如秋風之下霜彼孩
童婦寺華而不實爲榮幾何若彼之人不長則國家
之咎不長矣雖然小人信不長君子且不久復安所
訓乎小人不長則咎絕君子不久則凶成非獨聖人
言然天下不言而同然雖小人亦曰然乃終古今皆

然是謂无窮是謂无疆不久何必諱君子以日戒知
所舍也知所遷也復无疾心也臨有凶口也天譏卷
舌九州殊口以言爲說者天道常閉之矣睽之爲言
也言語不通嗜欲不同之極也行人之官以輯同異
反舌皆至惡人曷爲不可見吁睽之惡人刑餘之人
也天刑之爲貌不恭之罰人刑之胃爲獄而噬嗑仁
以利用之何校則重矣刀墨之民列在裔土非所近
也然可以見聖人不絕人甚俾其人務全其形骸之
所尊而存故告之曰无初有終聖人之矜不成人也
至西宮而易之辭見惡人見之刑人遇之眇之視跛

之履丁寧之毀折者兌也金行旣勝哀其無全人也
嗟乎賤人非所貴遇主于巷則宜之貴人非所刑有
八議之辟焉於其幾盈而先戒之流四凶族豈憚其
貴不同中國則已焉昴獄事也婁亦天獄五車之星
有主獄金行旣勝哀其無全人也議獄緩死忍以置
郵速之乎胃有大陵曰積京其北天船有積水死者
人之所不免民不得以疾死聖人之所大哀司民生
齒之數積於升平然後盛此不可不慶故王者自受
之天以爲嘉師而邦君大夫師長乃受之天子一民
不全司牧有罪况其顯聞於上大命泛而與其民如

山之積蚩尤以來幾更事矣容保之者其尙日夜感
言于民教以續其將絕而淡長以思之乎兵相駘藉
主亂者未亾而天下戶口減半以一二入故以一二
事故以一二物故使百姓人不聊生以得敵爲悅不
知仁者固無敵也危睽之孤痛中孚之敵孤莫知遇
敵莫知亾妻之聚衆垂涕泣而呼之平定安集不事
健鬪老幼滿其車下睽曰遇元夫則天將軍也軍之
南門誰何出入節制之不可亂也兵家之勝不可先
傳國之利器不可以示人君子在室則謀謀未發莫
之先聞者臨朝出治百官承命在位莫不徧聞之以

此爲通塞之常節也故古者重視朝而尊聽朔戶大
寢正室之戶也公卿謀謨其內則宮庭虛無人焉出
之者誰乎羣臣朝于治朝萬民咸造于外朝此門庭
也天子不出與百官萬民相見使大臣傳語則大臣
竊其命矣任左右則竊在左右任羣臣竊在所任之
微任婦寺竊在所任之嬖君子在中而不居正則必
不可以行正惟節爲然由蔽而不通故也壅蔽傷國
在中者壅蔽愈甚焉故節之正重于中不可不察也
安于中而不以時出下雖有尊親之心而上不知不
知則危矣上雖有子愛之心而下不信不信則離矣

下日離上日危而禍亂不作者未之有也中孚易大
過過涉滅頂澤滅木也乘木舟虛應天船也大過厚
終中孚緩死表大陵也舟虛故不敗于水雖五覆反
其隙終滲象著積水不害吾載則置夫國家亦有積
水自古不能無也信有之不可不虞必盡杜而塞之
爾有舟且不敢在水在陸然後可舟可陸乎大川可
以涉而不涉乎憚小疵棄大善察小害喪大功以二
雞子棄干城之將子思悲衛之弱也以積水棄天船
而坐汜游之上乘木者固如是乎善作之才若聖人
法可永而其終必敝敝可知也知之則待其所歸而

後救之易而爲隨時不未病而藥也治貴未亂勝貴
未戰然而無喪則不戚無戎則不城故曰可後而先
之謂之召災睽不從革輕百姓飾城郭實致之戒之
哉孤城必不可固也虛筐必不可承也呼萬物而內
之而亾其物之志則空器也高天下以聲而喪其聲
之主則大姦也翰音之飛以登于天天下受其不祥
毋寧眇而視跛而履乎人君建非常之功必先得知
人之佐苟非其人安分守法以求寡過守法誠易視
之履之足焉而務變常以自爲功彼以相承爲婦女
之檢押而不知卒爲敵於天下也收功實者于西北

能守之也奎爲虎尾可不觀其所以不啞人乎爻言
啞人卦言不啞人一以爲仁獸一以爲戾蟲知之則
哲聖人猶難之用不吉人增其惡名不見封豕之處
溝瀆乎譏慝俯張居實有徒不見大陵之有積尸乎
咸池以洒濯之毒螫其庶瘳矣乎則雨之施也遇之
者道在往睽外也曷謂外同姓爲內則異姓爲外旬
服爲內則諸夏爲外中國爲內則四夷爲外親者親
疏者附喪服之精麤眊其主人君與祖爲體以三爲
五以五爲九天五潢之流光遠矣哉若之何以行路
之人論骨肉而與俗吏慮兄弟也異姓助之同姓先

睦也諸夏輔之畿內先治也四夷畢來中國先安也
厥宗噬膚然乃往應諸異姓何咎之有吾未見親疏
易鄉而可以同天下國家者也八穀之重繫五車有
胃膚積而婁承之則衆可聚所謂得其所歸也節以
制度損以酌盈虛酌損之法莫善助甘節之味莫寶
稼穡國無損瘠則二簋可享矣祭祀之簋饌人共之
倉廩委積咸在司徒之屬而士師必與慮荒政聚萬
民之要在究咸池之政矣聚民而養之吾子也莫之
收而離之或且蹙之則寇也金粟不兩生職金在司
寇山之寶藏而實奸邪所以勸也金死則盜賊爲赤

子粟死則赤子爲盜賊而蠻夷乘以猾夏士師雖重
刑又惡能禁之哉觀婁胃而知周公之立秋官繫天
下之大命婁之左右爲古虞官是主山澤舜之重虞
也五人必尙益功而終始之聖人有天下曷嘗不日
見可欲力足以致之功足以享之德足以保之然而
山者藏之於山澤者藏之於澤時布之於萬民民皆
得焉物皆息焉貴有用美有益以薦諸神明一人耳
日母與焉禹貢之書是也是以天不愛其道地不愛
其寶人不愛其情虞官正好生而守至信則四靈可
以爲畜故曰信及豚魚也兵不復用刑不更試物則

安能處以不殺然而豚魚信聖人者信其時也信其
禮也既又合聚而索饗之伊耆氏之仁乃應乎天也
王者觀西宮之象豈弟君子與暴殄者同缺陷其于
上下草木鳥獸義止此其於百姓之命四海如一堂
上不以不聞見自解慰其肯安居紫宮而役使羣動
鼓之喜不衰人之罷歌之悅不痛人之泣歸妹之聞
甚於明夷殆必敝者也力不勝役財不勝求果不熟
爲荒筐无實已視不明則禍羊无血已寧獨一女一
士之不祥耶懲忿窒慾可以救敝不貳衣服不甘飲
食不事宮室不飭臺囿不近聲色不玩歌舞不樂遊

觀不騁田獵不恬刑殺不快戰鬪凡所以求生之厚
一切草創不詳不具天下有若此之人則人物之命
復由也故曰文敝矣救文莫如忠人雖不自救天必
有以易之損之孚節之亨皆所以昭闇昧覲光明也
兌剛長乾而三畫成夬剛長乾而六位成履之旋復
始于乾故曰其旋元吉旋者天道也天行左旋其道
舒主施於下日月之行右轉于天其道迫親奉於上
非斗振而進則日月周以歲縮相與爲無窮將近而
與地比非日遠而退則日月周以歲贏相與爲無窮
將遠而不覩其象一左一右一進一退且退之能力

遠不逮進則天道貴舒而恆尙施日月之在天臣道也疾而不得不以舒天爲君道施而勿報舒而勿迫者也履之左乾之位履上下辨履復于乾上下何以辨聖人辨之曰履之兌則元吉履之乾則得凶乾之姤龍之潛也姤之乾豕之羸也其辨上下六爻皆如此乾之彖曰元亨利貞不加一辭六十四卦之君也兌之彖曰亨利貞亦不加一辭若是嫌乎否乎乾至尊也宜爲君兌至卑不得以之乾爲其所宜夫凶其上履亦凶其三不使至卑擬至尊也使至卑承至尊則國安有虎哉夫人與虎不絕遠也國有禮虎將復

爲人否亦不啗人國無禮虎則啗人人亦啗人而爲
虎臣實无家損其家也承上以道節其階也臣節安
也不可以危君節甘也不可以苦震主之略危而不
安操刀必割苦而不甘惏惏之志行求安也夫履之
位豈遑甘也易之辭危危莫若履之辭懼以終始觀
於天也

八卦觀象篇下終

易曰庖羲氏之王天下也仰觀象于天俯觀法于地於是始作八卦又曰天垂象聖人則之又曰在天成象在地成形又曰縣象著明莫大乎日月然則攷二儀之運行奠二十八宿之次舍與夫日月盈縮五緯見伏固聖人設卦觀象奉若天道之要旨也竊嘗求之于漢中壘鴻範惟究五行君明易傳僅詳占候惟鄭氏爻辰差有條紀衷諸理道而闕佚殆甚但零文碎義約略存言外此揚氏大元創立州部乾鑿坤靈是類稽覽或述卦氣或推律秣皆非易旨又皆殘闕羴雜莫可是正然則聖人觀象繫辭奉天敬民之意

殆不可見乎吾郡莊方耕先生遽精天官律秣家言
而一以六經爲本其言易之書不一種而觀象解二
卷則以垂象之義言易者也其書首以八卦準四時
分至以二十八宿十二次準六十四卦而斗建雲漢
日月五緯緯焉次以北斗帝居奠乾維則四正四維
之統宗也以房心權衡咸池虛危奠震離兌坎則四
宮四正也以斗魁太階漢津攝提奠乾坤艮巽則四
紀四維也北斗自乾攜巽自西北徑東南天門地戶
也雲漢自艮達坤以陰升以陽降山河之首尾也星
紀牽牛日月之所終始也故封域之分星日月之贏

縮歲星熒惑填星太白辰星之見伏又次之此言象
之大旨而易應焉其首乾次坎次艮次震次巽次離
次坤兌出震齊巽見離役坤悅兌戰乾勞坎成艮之序
也需大畜大壯小畜大有泰夬訟統乎乾蒙解渙未
濟師困遯蹇統乎坎小過漸旅謙咸无妄屯頤統乎
艮益噬嗑復隨大過升鼎統乎震恆蠱井姤革明夷
統乎巽家人豐賁旣濟同人萃統乎離晉觀豫剝比
否統乎坤臨睽中孚歸妹損節履統乎兌出震齊巽
見離役坤悅兌戰乾勞坎成艮之序也不首震而首
乾尊乾而主斗也斗帝居也乾艮巽坤貞四孟貞朔

候也坎震離兌貞四仲貞中氣也震兌以北卦三十
六震兌以南卦二十八應乎地也乾坎艮統卦各八
震兌統卦各七巽離坤統卦各六應乎地也上坎以
當天極下震兌以交地平中衡上地平下極常傾衡
常倚左流海右積高地勢然也此言易之大旨而象
應焉至其明君臣之道篤父子之恩敦宗族親疏之
詣正妃匹嫡庶之嫌內而甸采所以享王外而蠻夷
所以賓服以及用人設教理財治獄行師命將皆言
之不足而長言之詳言之不足而反覆言之若不自
知其言之重辭之危者而要其歸則於聖人先天勿

違後天奉若之心莫不由然其有合也釐然其有當也釋釋然其深切而著明也書曰日月歲時無易又用明日月歲時既易又用昏不明易曰懼以終始其要无咎天人之際道固若此然則聖人設卦觀象之意不可得而見者庶幾可於是書見之乎先生之言曰聖人見道然後知王治之象賢者見經然後知人道之務知人道之務則知王治之象矣若先生者其真知人道之務矣先生經說多已刊布是書則今歲吾師申耆先生始刊行之余又得先生之孫經饒先生寫本校正焉道光十八年歲次戊戌八月同邑後

學薛子衡謹跋

卷一

三

跋

乾爲天門巽爲地戶乾至隨履至大過六十四悔卦
一順一逆皆始乾終兌以交於巽此重卦之序也坎
正北也而讓於訟艮東北維也而讓於遯蹇震正東
也而讓于无妄屯順巽東南維也而讓于大過升鼎
以至離爲草據坤爲萃居六位皆不正矣故震巽各
進三艮離各進二坎坤各進一而後四正四維不愆
于位焉此奠卦之義也日躔有盈縮春及秋日多而
度少損至大過列卦三十秋及春日少而度多隨至
節列卦三十有四應乎天矣中衡交地平於卯酉中

國之地南距地少北距地多震兌以南卦二十八震兌以北卦三十六應乎地矣日右行于天杓左旋于地冬至日在牽牛杓則指坎故占在危初順是以下皆如其不始冬至而始立冬何也八風之序也不周風居西北主殺生乾之位也東壁居不周風東主辟生氣而東之至于營室主營胎陽氣而產之東至于危言陽氣之危境其于十二子爲亥亥者該也言陽氣藏于下故該也夫既該陽氣而胎產之則不可以爲始乎終則有始天行也周官封域各有分星裨竈梓慎其言如響乃太史天官言而不詳蘭臺地里

詳而寡要其天文一志又錯出漢時方州非好學深思而心知其意仰觀俯察之旨不其晦乎唐僧一行是究是圖發其歸趣聖人復起不能易焉爰取其推闡之精去其改移之跡期有當于古而已矣衛地漢隸沅州是易姬訾爲壽星巴蜀漢曰益州是分鶉首爲實沈魏之西境漢隸冀州故曰易實沈爲大梁全趙之地漢入并州故曰易大梁爲姬訾韓鄭之地漢時分隸豫州三河故曰壽星易而其野入于心及味也爲之條分縷晰焉漢之分星猶有說焉以處此又何疑于古乎陰陽遲疾始于乾象歲差始于大明前

此未之有也曷爲及之曰漢初所傳黃帝顓頊夏殷
周魯六術以推春秋多所抵牾定爲僞托而三代之
盛不聞星辰失次至周衰乃頻見之則三古推步法
數本密迨疇人散失而後浸亡耳賅而存焉益以見
易道之無窮也方耕先生遺書大半多已刊行是書
則吾師申耆先生今歲校刊也剗剗旣就以景昌習
于天官家言命疏其所以故述其略例如右道光戊
戌季秋月朔江陰後學宋景昌謹跋

卦氣解

莊氏學

味經齋遺書一

卦氣始中孚終於頤渾蓋之象包括始終也乾辟巳
坤辟亥攝提方也巽侯申艮侯亥日月會也巽後而
艮先天行有進退也先卯中而晉後酉中而明夷歲
之晝夜也晉近而明夷遠勸賞畏刑之義也晝漏幾
中而益夜漏幾中而損盛衰之始也解正春分物不
解則不散賁正秋分物不飾則不斂辰始豫雷出地
戌始歸妹雷保蟄蟲知之者曰歸妹不知者必以爲
隨隨之爲言其將出也已中小畜玉衡建也亥中噬
嗑大辰繫日而將見也火始昏見而震在地球上火始

晨見而震在離上震卯也卯大火之次也百穀仰膏
雨則木上有水而爲井霜隕水涸則澤无水而爲困
收擴畢而獻功旣濟也天地閉水火不交未濟也且
以嗣往歲興來歲也日南至四十有五而啟故反
中孚爲小過日北至四十有五而閉故反咸而爲
恆蹇先頤屯次復艱難之義以相天地也且三男之
卦也開物成務男事也家人先井鼎次姤柔順之則
時出位陽也且三女之卦也無攸遂在中饋女事也
復爲剛長姤曰女壯其以類從乎井養也頤養也陰
陽之際義莫大乎養也百蟲作蠶事興而蟲皿爲蠱

耒耜出耕者舉足而施生爲益享帝之吉祈農之祀
與雷出於地雨絕於天訟豫之相因也王政時變火
以救疾故客火爲旅冶火爲革突爲家人爨爲鼎燧
爲睽災燔爲豐夏丙明爲大有秋清明爲同人房心
伏爲噬嗑恆星見爲賁出東爲晉入西爲明夷明火
爲既濟鄉晨之暉爲未濟初夏改火民咸從之旅也
季春出火民咸從之革也水土演而民用潦方盛則
無有障塞師比之反而相受也由此時有大旱小畜
之密雲不雨也時有霖雨節之中正以通也陽之汙
以天地之雨名之陽之氣以天地之疾風名之則渙

汗之出而不反也淵泉動屯也冰泮蒙也雲升需也
龍出泉解也天降時雨訟也通瀆於四海師也絡脈
通潤下而不竭比也抱甕而汲以濟艱食井也蕩瑕
穢而潔之渙也露甘以繁節也霜肅而殺困也水始
冰旣濟也雪未澤未濟也塗未滌蹇也發聲以往震
則居悔收聲以後震則居貞小過在悔就生氣也歸
妹在悔殆歸魂也屈於上爲歸妹主於內爲无妄生
生之謂也正月必雷雷不必聞唯雉爲必聞之益其
雉之聞以震乎金伏於火剛蟲不搏則履虎之不咥
人乎鳥獸未成故田无禽始殺而嘗故獲三品萃用

大牲童牛豮豕實用以祀則犧牲告備具於天子時也陽月之物常爲反生枯楊非乎定之方中利以作室棟隆非乎婦功成則有行農桑起則殺禮旣濟婦在塗也蒙之吉納婦漸之吉女歸婚姻之義備焉建正於丑雞鳴爲朔而色尙白升之象也坤其正巽其朔而色亦巽也王者之正皆曰三朝升之所以爲元亨也艮者時也連山之易實爲夏時孟月之吉宜有艮焉孟春小過也孟夏旅也咸宜爲孟秋而以恆蹇宜爲孟冬而以艮恆者咸之反也亥者艮始且先天位也艮居孟冬義遠矣哉咸之爲夏日至也因於艮

也艮居西北矣咸池在亥非咸乎朱鳥在亥非賁乎
蒼龍出泉而爲解朱鳥在山則爲賁天五潢舍西北
則爲咸舍東南而爲中孚天畢上轡五車下軫不觀
於象孰知中孚之反於咸也大火在亥宜爲小過易
之則爲頤元枵在亥宜爲蹇以乾則爲需西北天位
也位乎天位以正中也坎離震兌之臨西北皆有取
乎象云爾北斗爲天綱乾爲魁巽爲杓杓以治外魁
以治內小畜之象也斗建巳也雲漢爲地紀艮其首
坤其尾首下地而潛尾行天而見謙之象也斗建丑
也日加酉而昴見於午睽之象也離兌不交也月弦

於角亢則巽坎之交而爲井乎天根見而水涸无妄之象也是主疫則无妄之疾乎日歸於西起明於東月歸於東起明於西東西相從而不已是故震兌者日月之門賓主之位夫婦之別也日出於卯月闕以隨則兌震之配而爲隨乎小畜之需日月幾望需之井曰利用恆恆弦也井弦而需望也月之望也行遲既望則魄生於右而遡日也疾需隨之所以相受也月魄也魄兌也其明魂也魂震也隨之息魂魄交也不交則爲歸妹息止斯魂魄離君子以永終知敝修身以俟之而已矣不死之說妄之大者也歸妹之以

无妄受也言魂氣之必歸於天也且言人道之以父子嬪爲一身而非有二也鬼神之德誠也無常享享於克誠也送魂而往迎精而返必誠必信勿之有悔焉耳矣无妄之謂也是故魂氣歸於天无妄也形魄歸於地臨也哭泣之哀以爲怛化不知鬼神之情狀則云爾也始死之復復也魂降而反也生死畢而鬼事始已夫體魄未藏魂恆依焉旣葬則依子孫以爲歸者也葬之不可以不時也且必以制大過也安體魄於地之戶也亢龍絕氣多藏金玉則夬之終有凶乎古有展墓之禮焉日次於大陵則今皆行之惡其

傷之也井其坎乎賁其封乎祔於墓祔於廟萃也父子祖孫一氣也鋪筵設同凡夫婦之精氣合也臨之易爲萃无妄之易爲大壯樂以迎來哀以送往之志與坎月也艮納丙蹇月消丙也坎律也艮在寅蒙太族律也律述氣而月行天外內之象也蒙師道也古者樂正司業是以於蒙著律焉夫自遂古以及今茲自京師以訖四海非聲曷以相授受乎是不可不正之以律也泰益上則爲損否益下則爲益泰次益否次損中衍以漸何也益上則擊漸上則不可亂天地之交以漸而况人乎夫漸之天地猶否也而其人則

交致天地之和者人也人受天地之中以生寅之中
人之中也自寅之戌乾皆在焉陽氣之位寅而見戌
而入也初於泰中於乾終於无妄明天道也以配始
以繼終明王之敬其妻子也有道矣巽之位乾之對
乾至尊而巽至卑小畜之先乾也爲之引而不敢適
也夫乾辟之辟也九五乾之大有也天之權在日大
明終始三百八十四爻之綱紀繫焉大有之次乾也
以此夏三月巳中以往卦無坤焉冬三月卦無乾焉
坤始於否迄於比比大有之對也陽居尊位爲五陰
主則亦乾之次也故以先小畜也若夫一陰之爲五

陽主也莫卑於姤而女壯矣莫岌岌於夬而乘剛矣
得位則小畜得位得中則同人得尊位大中則大有
不得位不得中者履也爻不當而卦則得其所矣兌
進則爲乾疑者也上天下澤辨之至也辨莫辨乎履
和莫和平履蓋暑過中而猶未退也陽常居大夏而
以生育長養爲事自夬至同人皆盛德氣也履爲基
而謙爲柄謙爲權而履爲繩中央司下土北方司冬
寒暑之則乎艮寒也兌暑也艮日之舍也兌月之行
也日月運行一寒一暑暑融於天寒藏於地謙之光
明是曰謀而時寒若履之光明是曰哲而時燠若謙

有坎而履有離也夫陰之居大冬也一陽爲五陰主
惟復與謙復動而謙止止于外爲剝止于內爲謙積
於空虛不用之處斯明徵已豫也師比也居陽盛之
時以爲佐而從焉散之使不積則莫能疑於陽者也
陽可聚也陰不可使積也藏於虛而已矣

自中孚迄井陽爻八十九陰爻九十一共一百八十
當半歲實其在晉以前陽爻三十八解以後陽爻五
十一歷日在春分前則少在春分後則多之象也自
咸迄頤陽爻九十一陰爻八十九共一百八十當半
歲實其在大畜以前陽爻五十四賁以後陽爻三十

七歷日在秋分前則多在秋分後則少之象也陽爻多則陰爻少象行度之縮焉陽爻少則陰爻多象行度之盈焉自解迄大畜陽爻一百有五陰爻七十五晝永而夜短也自賁迄晉陽爻七十五陰爻一百有五晝短而夜永也二至相距陰爻陽爻不正九十而多一少一者何也曰吾以是知歲實之有消長也坎離震兌居四正以候分至二十四晝以統一歲之氣實兩乾坤之爻以當一歲之晝夜中孚以逮于頤實皆乾坤之爻三百六十以當期之日坎離震兌小成之卦十二晝以當氣盈朔虛其候之也則卦直六日

有七分焉而四卦不用

辟卦十二乾坤之爻各三十六侯卦十二

屯小過需豫旅大有

鼎恆巽歸妹艮未濟

乾坤之爻各三十六凡百四十有四畫合

坤之策辟治天下侯治一國皆君道也辟以序而侯

以錯讓於辟也臣道也公卦十二

中孚升漸解革小畜咸履損賁困大

過乾爻四十一坤爻三十一有師保之誼焉卿卦十

二

睽益晉蠱比井渙同人

乾爻三十五坤爻三十七讓

于侯也大夫卦十二

謙蒙隨訟師家人豐節萃无妄既濟蹇

乾爻三十

二坤爻四十讓于卿也公卿大夫凡二百一十有六

畫合乾之策也

新唐書歷志

常氣

月中節
四正卦

初候

次候

末候

始卦

中卦

終卦

冬至

十一月
中坎初六

丘蚓結

麋角解

水泉動

公中孚

辟復

侯屯

內

小寒

十二月
節坎九二

鴈北鄉

鵲始巢

雉始鳴

侯屯

外

大夫謙

卿睽

大寒

十二月
中坎六三

雞始乳

鶯鳥厲疾

水澤腹堅

公升

辟臨

侯小過

內

立春

正月
節坎六四

東風解凍

蟄蟲始振

魚上冰

侯小過外

大夫蒙

卿益

雨水

正月申
坎九五

獺祭魚

鴻鴈來

草木萌動

公漸

辟泰

侯需內

驚蟄

二月節
坎上六

桃始華

倉庚鳴

鷹化爲鳩

侯需外

大夫隨

卿晉

春分

二月中
震初九

玄鳥至

雷乃發聲

始電

公解

辟大壯

侯豫內

清明

三月節
震六二

桐始華

田鼠化爲鴽

虹始見

侯豫外

大夫訟

卿蠱

穀雨

三月中
震六三

萍始生

鳴鳩拂其羽

戴勝降于桑

公革

辟夫

侯旅內

立夏

四月節
震九四

螻蝻鳴

丘蚓出

王瓜生

侯旅外

大夫師

卿比

小滿

四月節
震六五

苦菜秀

靡草死

小暑至

公小畜

辟乾

侯大有內

芒種

五月節
震上六

螳螂生

鵙始鳴

反舌無聲

侯大有外

大夫家人

卿井

夏至

五月中
離初九

鹿角解

蜩始鳴

半夏生

公咸

辟姤

侯鼎內

小暑

六月節
離六二

溫風至

蟋蟀居壁

鷹乃學習

侯鼎外

大夫豐

卿渙

大暑

六月中
離九三

腐草爲螢

土潤溽暑

大雨時行

公履

辟遯

侯恆

內

立秋

七月節
離九四

涼風至

白露降

寒蟬鳴

侯恆

外

大夫節

卿同人

處暑

七月中
離六五

鷹祭鳥

天地始肅

禾乃登

公損

辟否

侯巽

內

白露

八月節
離上九

鴻雁來

玄鳥歸

羣鳥養羞

侯巽

外

大夫萃

卿大畜

秋分

八月中
兌初九

雷乃收聲

蟄蟲培戶

水始涸

公賁

辟觀

侯歸妹內

寒露

九月節
兌九二

鴻鴈來賓

雀入大水爲蛤

菊有黃華

侯歸妹外

大夫无妄

卿明夷

霜降

九月中
兌六三

豺乃祭獸

草木黃落

蟄蟲咸俯

公困

辟剝

侯艮內

立冬

十月節
兌九四

水始冰

地始凍

雉入水爲蜃

侯艮外

大夫既濟

卿噬嗑

小雪

十月中
兌九五

虹藏不見

天氣上騰地氣下降

閉塞而成冬

公大過

辟坤

侯未濟內

大雪

十一月節
兌六六

鶡鴒不鳴

虎始交

荔挺生

侯未濟外

大夫蹇

卿頤

周書時訓解

立春之日東風解凍又五日蟄蟲始振又五日魚上
冰風不解凍號令不行蟄蟲不振陰奸陽魚不上冰
甲冑私藏雨水之日獺祭魚又五日鴻雁來又五日
草木萌動獺不祭魚國多盜賊鴻雁不來遠人不服
草木不萌動果蔬不熟驚蟄之日桃始華又五日倉
庚鳴又五日鷹化爲鳩桃不始華是謂陽否倉庚不
鳴臣不闕主鷹不化鳩寇戎數起春分之日玄鳥至
又五日雷乃發聲又五日始電玄鳥不至婦人不闕
雷不發聲諸侯闕民不始電君無威震清明之日桐

始華又五日田鼠化爲鴛又五日虹始見桐不華歲
有大寒田鼠不化鴛國多貪殘虹不見婦人苞亂穀
雨之日萍始生又五日鳴鳩拂其羽又五日戴勝降
于桑萍不生陰氣憤生鳴鳩不拂其羽國不治兵戴
勝不降于桑政教不中立夏之日螻蛄鳴又五日蚯蚓
出又五日王瓜生螻蛄不鳴水潦淫漫蚯蚓不出
嬖奪后王瓜不生困於百姓小滿之日苦菜秀又五
日靡草死又五日小暑至苦菜不秀賢人潛伏靡草
不死國縱盜賊小暑不至是謂陰慝芒種之日螳螂
生又五日鷓鴣始鳴又五日反舌無聲螳螂不生是謂

陰息鵲不始鳴令奸壘偪反舌有聲佞人在側夏至之日鹿角解又五日蜩始鳴又五日半夏生鹿角不解兵戈不息蜩不鳴貴臣放逸半夏不生民多厲疾小暑之日溫風至又五日蟋蟀居壁又五日鷹乃學習溫風不至國無寬教蟋蟀不居壁急迫之暴鷹不學習不備戎盜大暑之日腐草化爲螢又五日土潤溽暑又五日大雨時行腐草不化爲螢穀實鮮落土潤不溽暑物不應罰大雨不時行國無恩澤立秋之日涼風至又五日白露降又五日寒蟬鳴涼風不至無嚴政白露不降民多邪病寒蟬不鳴人皆力爭處

暑之日鷹乃祭鳥又五日天地始肅又五日禾乃登
鷹不祭鳥師旅無功天地不肅君臣乃闕農不登穀
暖氣爲災白露之日鴻雁來又五日玄鳥歸又五日
羣鳥養羞鴻雁不來遠人背畔玄鳥不歸室家離散
羣鳥不養羞下臣驕慢秋分之日雷始收聲又五日
蟄蟲培戶又五日水始涸雷不始收聲諸侯淫佚蟄
蟲不培戶闕靡有賴水不始涸甲蟲爲害寒露之日
鴻雁來賓又五日爵入大水化爲蛤又五日菊有黃
華鴻雁不來小民不服爵不入大水失時之極菊無
黃華土不稼穡霜降之日豺乃祭獸又五日草木黃

落又五日蟄蟲咸俯豺不祭獸爪牙不良草木不黃
落是爲愆陽蟄蟲不咸俯民多流亡立冬之日水始
冰又五日地始凍又五日雉入大水爲蜃水不冰是
謂陰負地不始凍咎徵之咎雉不入大水國多淫婦
小雪之日虹藏不見又五日天氣上騰地氣下降又
五日閉塞而成冬虹不藏婦不專一天氣不上騰地
氣不下降君臣相嫉不閉塞而成冬母后淫佚大雪
之日鷦鳥不鳴又五日虎始交又五日荔挺生鷦鳥
不鳴

闕

虎不始交

闕

荔挺不生卿士專權

冬至之日蚯蚓結又五日麋角解又五日水泉動蚯蚓

蚓不結君政不行麋角不解兵甲不藏水泉不動陰
 不承陽小寒之日雁北向又五日鵲始巢又五日雉
 始雊雁不北向民不懷主鵲不始巢國不寧雉不始
 雊國大水大寒之日雞始乳又五日鷩鳥厲疾又五
 日水澤腹堅雞不始乳淫女亂男鷩鳥不厲國不除
 兵水澤不腹堅言乃不從

蠱元亨利涉大川先甲三日後甲三日

丹天之氣輕於牛女戊分齡天之氣經於心尾已分蒼天之氣經於危室柳鬼素天之氣經於亢氏昂畢玄天之氣經於張翼婁胃所謂戊己分者奎壁角軫則天地之門戶也是故甲艮也乙震也丙丁離也戊乾也已巽也庚辛兌也壬癸坎也記曰明孟也幽幼也幽明雌雄也雌雄迭興而順至正之統也是故乾爲雄巽爲雌艮爲雄震爲雌坎爲乾之雌離之雄離爲兌之雄坎之雌兌爲離之雌震之雄歸藏於坤坤爲大包順之至也艮幼震長

而雌雄不從何雄好生雌好殺剛日主德柔日主
刑古之興者未有不尙德而好生者也自尾之軫
以甲暉己歲陽曰閔逢其卦曰蠱女惑男謂之內
嬖傳曰獲其雄狐母愛者子抱矣自軫之尾以己
配甲歲陽曰屠維其卦曰漸己甲之妃也有親迎
之儀焉女歸待男行也故吉木與土合而爲土柔
道也自亢適畢以乙嫁庚庚爲甲仇乙爲甲妹歲
陽曰旃蒙其卦曰歸妹所歸妹也乙承筐而木不
果故无實焉庚剋羊而腥非生氣故无血焉戒之
哉金之族殺之主也自畢適亢以庚係乙歲陽曰

上章其卦曰隨贅壻之象人无故也係小子失丈夫係丈夫失小子女擇人而事之可兼與哉金與木合而爲金從剛也庚勝甲隨反蠱乙勝己歸妹反漸乙蒙而庚章歸妹乘剛而隨下柔也自翼至婁以丙附辛歲陽曰柔兆其卦曰睽臣虜而得妻逃歸其國則棄其家睽外也火動而上澤動而下流而不知所止鑠而不從所成火與金合則爲水其象然歟以辛從丙自婁至翼歲陽曰重光其卦曰革水火相息而不言澤澤中有火海出日也上火下澤盛陽雨也或源也或委也睽爲潦而革爲

海是非水而何忠臣不二君烈女不二夫辛之從
丙也改適也夷齊蓋且恥武王焉革爲去故辛爲
重光吾以是知革之爲辛也自柳及危以丁趨壬
歲陽曰強圉其卦曰未濟女不聘則爲妾於始入
室亦姑禮焉而弗之成也陰居陽位火不畏水非
彊禦與故曰男之窮也自危及柳以壬得丁歲陽
曰元默其卦曰既濟女在塗稱婦先成之也既濟
定也雖喪其弗卒可得也喪于丁得于癸伐于丁
克于己矣水火合而爲木木生氣也天地之生在
火水之合焉是故生氣爲木長氣爲火化氣爲土

收氣爲金藏氣爲水非五材之謂也成象而已矣
本乎天者親上本乎地者親下天門紫宮上也辰
氣親之故曰火雲漢角軫下也化氣親之故曰上
天地之勢東西爲橫南北爲從木從而金橫木生
而金殺也丙入於戌而水象見焉本也酉入於辰
而水流趨焉末也水以藏爲德者也故曰丙辛爲
水河在辛江在丙其原在坤洛邑之居實然夫坤
所以藏也水藏氣也不依乎坤而何依也水附於
地火章於天離兌夾乎坤坎通乎乾坤爲萬物之
母水爲萬物之所親焉乾爲萬物之君火爲萬物

之所尊焉自乾歷坎以戊帥癸歲陽曰著雍其卦
曰訟天尊而不親火亦尊而不親也婚姻若此能
無怨乎故曰訟不親也自坎歷乾以癸待戊歲陽
曰昭陽其卦曰需天門紫宮不自明也而大明光
亨之謂也經緯四通曰癸所以揆萬物也上方揆
則下咸待故不進也蠱之反曰隨蠱之易曰漸庚
克甲而已配甲也甲艮也艮坤之對也連山歸藏
之義不在周易乎